



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 8

Yangia anidakangma :



Tir Yimiyim



tir_yimiyim



tir yimiyim

TAPAK 3



Neymar Brazil World Cup squad nung züngokogo



Taoba Uttarakhand chief minister Bhuwan Chandra Khanduri süogoo

VOL. XXIII ISSUE NO. 216 (ADOK 216) DIMAPUR RASEMNÜ (WEDNESDAY) MONUPII (MAY) 20, 2026

₹ 5.00

Mkg district nung ak wara puteta lir

Dimapur, May 19, 2026 (TYO): Mokokchung District kübok Chungtia village, Kangtsungyimsen village, aser Shitikolak ward, Tuli nung African Swine Fever (ASF) putetba osang metetdaksüba nung ajemdaker tenokdangba kar agütsüogoo.

Iba osang ya Chief A.H & Veterinary Officer, Mokokchung-i May 12, 2026 nü sangdong ka nung ashi aser iba nung ajemdaker ak wara puteta aliba tesemtem nung akshi malitsü aser machitsü metetdaksür ta Mokokchung Deputy Commissioner Ajit Kumar Verma, IAS-i ashi.

Ak wara puteta aliba tesemtem nung Veterinary Department-i bangdak Area Administrative Officers den külemi mita repringtsü ta Mokokchung DC-isa metetdaksü.

Tangalen nungi ak bener aruba

maparen Veterinary Department-i akangkanga repringtsü. Veterinary Department-i district telungi bener aitba ak tendangtsü aser Tuli Sub-Division nung designated stockyards nung transit time ji ghonda 24 tema masütsü. Iba sülen Tuli nungi tanga Sub-Divisions aser districts-i ak dispatching/transporting masüdüang tendangtsüla paisa ashi.

Department-i arrtsülen tensa jungjunga asadangtsü aser wara prokshia moudaktsütsü atema tendangtsü. Maneni, public kanga kümdanga alitsüla aser ak shirangba mesüra ASF ajanga asü ama temulung melemba tatalokba ajak Dr. Imtilong Longkumer, Veterinary Assistant Surgeon, Contact number-9500807407 ajanga Chief A.H & Veterinary Officer, Mokokchung nem osang sangoktsütsü mepishir ta Mokokchung DC-isa metetdaksü.

Nagaland CBSE schools nung Sanskrit compulsory züngdaksüba ya tim masü: DNSU

Dimapur, May 19, 2026 (TYO): Nagaland nung CBSE schools nung Sanskrit compulsory züngdaksütsü tetuyuba anema ola adokang ta Dimapur Naga Students' Union (DNSU)-i Nagaland Governor Nand Kishore Yadav dang shiogo.

"CBSE school tem nung Sanskrit compulsory benokba ya terenemba kecha melii, mesüra tesayur melii mesüra kaketshirtem yaritsü inyakyim kecha melii mapa tenzüker" ta DNSU-i Dimapur deputy

commissioner ajanga Governor dangi shidi ka züluogoo.

Onoki oshi ka angazükba anema masü saka kaketshirtem aser tsüraburtemi timtem ajuruba nung ajemdaker iba inyakyim magizüker ta DNSU-i shidi nung shia lir.

Kaketshir aika tazünga nung tetsükdaksü ajurua lir aser inyakyim shitak melii Sanskrit compulsory züngdaksüba ajanga parnok ratar, shisabulur aser academic tsütsü jenjang tamajung angutsü tsübur ta DNSU-isa Nagaland Governor dang shiogo.

Kohima nung FGN züngsem 2 apu



Dimapur, May 19, 2026 (TYO): Kohima Police-i May 18, 2026 nü jila nung telungpur ana puogo aser tena ya intelligence-i anir inyakba maparen ka nung apu.

May 18 anepdang 8:00 ako meta Kohima jila tiyongtsü nung telungpur kar senzüba osang angazük aser iba nung ajemdaker Kohima Police-i mita aotsü tenzüker ta PRO, Kohima Police-i sangdong ka nung ashi.

Police-i anüngdang 2:00 ako meta Razhü Point area nung tai tonglokja alir nisung ana apu. Tena ya FGN (Rhakho group)

nung 'Chaplee Finance Kilonser' Kudukhoyi Vero (38 yrs) aser NNC/FGN (Akavi Chishi group) nung 'Colonel' Mulevo Khesoh (35 yrs) na ta jangjaogo.

Tena ket nungi "Yearly Vehicle Tax" slips 14, "Non-Local Tax receipt" 1, "Information letters" 3, "Annual Commercial Tax" documents 5, "Residency Registration" slips 10 aser Kedahge FGN (Akavi Chishi) tenüng nung "Assignment Order" 1 bena aliba puogo.

Tena apuba sülen North Police Station nung ken o ka benokogo aser maneni tashiyim agi sen saruba inyakyim bushisüngdang südar. Tena dang nungi osang tejangja metettsü atema asüngdangya südar ta PRO, Kohima Police-isa ashi.

Kohima Police-isa sensotem aser shishilembartem dang tashiyim agi sen meshiba osang metsübu dang police nem sangoktsütsü mepishia metetdaksüogoo.

Naga customary laws den putepa tanur kümzüka ayutsü shisalemsatep

Kohima, May 19, 2026 (TYO): Nagaland nung customary laws aser sobaliba nungi benshia aruba inyakyim akhümtsüba Juvenile Justice (Care and Protection of Children) Act and Adoption Regulations mapa tenzüksüla ta Nagaland Social Welfare Secretary Liawabang Jamir-i ashi.

Department of Social Welfare in Kohima-i kübok Mission Vatsaly-i ayongzükba State Consultative Meet nung Limawabang-i iba ya ashi.

Juvenile Justice Act and Adoption Regulations nung legal framework dena lir saka Nagaland inyaksangshi den putepa inyakba agi dang takok angutsü ta Limawabang-i ashi.

Iba legal framework nung seamless digital connectivity, standardised police systems, aser institutional care structures dena lir saka Nagaland nungbo customary adoption practices lir aser iba ya kin aser yimtsüngtem inyaksangshi nung amendaka lir ta paisa metetdaksü.

"India nung Nagaland balaka asübaji Article 371A kübok

temeten balala agüja aliba ya lir aser iba ajanga Naga customary laws, inyaksangshi aser sobaliba rejutem kümzüka ayur" ta Limawabang-isa ashi.

Nagaland nung kibongtem, kin, village councils, arogotem aser lisopur rejutem ajanga putu aika tanurtem kümzüka arur aser iba ya Naga loktiliba nung tongshi tashitaitiba rongnung ka lir ta paisa ashi.

"Ajisüaka, sobaliba nung benshia aruba inyakyim ajanga tanur adopt asüba ajanga maittsü, senmang, shisaliok, welfare entitlements aser long-term security nung tetsükdaksü ajurur. Onoki ozüng raksatsüba masü mesüra asen sobaliba inyaksangshi magizüksü masü saka Nagaland den putepa item ozüngtem benshitsüba lir" ta Limawabang-isa ashi.

Anungji Social Welfare Department, judiciary, police, medical fraternity, district administrations, aser sobaliba rejutem külemi amalitepa iba asoshi inyaksüla ta paisa ashi.

"Adoption ya temeim mapa ka saka iba maparen ya ozüng lateta

aliba ama inyaksüla" ta Limawabang-isa shisem.

"Juvenile Justice Act aser iba dak sendakba maparen melenshitsü atema maparen tenzükbaji Nagaland mezüngbuba state lir" ta Ministry of Women and Child Development, Government of India nung Senior Consultant Junaid Ul Islam-i ashi.

Centre sorkari system tajungba kümdaktsütsü asoshi state tem dang nungi Juvenile Justice Act, Model Rules, and Adoption Regulations atema tebilembatem meshir Islam-isa ashi.

State Consultative Meet ya Juvenile Justice (Care and Protection of Children) Act, 2015, Juvenile Justice Model Rules, 2016, aser Adoption Regulations, 2022 atema ayonga agiogo.

Iba sentong nung Child Welfare Committees (CWCs), Juvenile Justice Boards (JJBs), government & NGOs ajanga lapokba Child Care Institutions, police, media, district administrations, Health & Family Welfare officials, aser Nagaland State Commission for Protection of Child Rights aden.

Naga teloktemi Thadou arogo lennirtem metepset: UNC

Imphal, May 19, 2026 (Agencies): Manipur nung Naga teloktemi Thadou arogo lennir asem tepset ta tai tongloktsüba magizüker ta United Naga Council (UNC)-i metetdaksüogoo.

Iba tesem nung inyaksangshiba Kuki telungpur teloktemi parnok amak asütsü akok ta UNC-isa ashi.

"May 13 nü amakba aitsür aser iba lendong nung tasürtem ya yimjung aser tangatettep nokintertem liasü. Parnok tepsetertem anema legal action agiba nung onoki pusema nungittsü" ta UNC-i sangdong ka nung ashi.

Iba lendong ataloker mapang tatsüka dang lir Naga nungger dak tai tonglokja social media

campaigns tenzüker. Kuki Inpi Manipur (KIM)-ibo ZUF-Kamson Group aser NSCN-IM ajanga Thadou nungger arogo lennirtem tepset ta sangdong ka ajanga tai tongloktsüogoo ta parnokisa ashi.

Ajisüaka, KIM-i aitsüba sangdong ya "6/5/2026" nü züluba liasü aser ibaji lendong matalokdang anogo tenet jelia züluba lir. Iba sangdong ya parnoki jelia renema yua aliba ama bilemer aser Kuki Inpi Manipur-Naga teloktem dak tai tongloktsüba atema kuli tejangja sayutsüla ta UNC-isa metetdaksü.

Iba lendong atalokba sülen Army dena security forces-i teinyaktsü tim meinyakba aitsür. Leimakhong nung 57 Mountain

Division headquarters anasa dang liasü aser iba anogo parnoki mapa tajungba inyakteta liasü UNC-isa ashishitepogo.

Lendong ataloktsü ana nung aliba Naga tesemtem nung security peria lemezükja mali ta parnokisa mepelaba olen ka ashi.

Centre aser Manipur sorkartemi Suspension of Operations (SoO) agreement nung aliba Kuki telungpur teloktem dak tapet mapa inyaksüla. Sorkartemi telungpur ket nungi prangpong meshia ayutsüla aser designated camps nung lidaktsütsüla. Telungpur teloktemi ozüng alema inyaksangshiba manenra SoO agentsüla ta UNC-isa ashi.

(Maneni tapak 8 nung...)

Nagaland Foothills Road atema bangzüng asem renem

Dimapur, May 19, 2026 (TYO): May 19, 2026 nü Nagaland Foothills Road Co-ordination Committee (NFHRCC) aser Dimapur nung amenoka aliba kin hohotem külem senden nung bangzüng asem renemogoo.

Dimapur nung amenoka aliba kin teloktemi acha-ayanga tongti kin hoho 15, Dimapur nung amenoka aliba kin hohotem aser NFHRCC tsüngda külem senden ka amentsü atema senden nung adenertem bangjemtep.

Parnokisa tekaratiba nung Foothills Road maparen inyakba ajak külemi sema senzütsü aser

Nagaland Public Works Department (Roads and Bridges) dang SASCI loan scheme kübok administrative approval nung ajemdaker open tender ajanga second-phase work orders renemtsü takhangba agütsüshitsü bangjemtepogoo.

April 14 nü Hotel Saramati nung consultative meeting sülen tanü NFHRCC office, Kher Mahal, Dimapur nung senden amentsü ayongzük. Ajisüaka, Dimapur nung amenoka kin hohotem dak alaka tongti kin hohotem iba senden nung maden. Ao Senden, Konyak Union,

Lotha Hoho aser Phom Peoples Council-i shidi balala ajanga iba ama mapang ka nung state sorkar anema lungkak aitba pusema menungittsü ta shia senden nung medentetba osangtem yok. Maneni, Lotha Hoho-ibo NOC agüja liaka tanü senden nung Dimapur Lotha Hoho maden.

Külen, WSH aser CPO-ia media ajanga NFHRCC ajanga inyakba maparen nung mepelaba kecha mali saka parnok tongti hohotem tuyuba ama senden nung madener ta metetdakja liasü ta Media Cell, NFHRCC-i sangdong ka nung ashi.

Tenyimi Union Nagaland-i Naga Plebiscite Day amung



Tenyimi Union Nagaland-i May 16, 2026 nü Shilloi Lake nung Naga Plebiscite Day bilemteta amungdang tangokba noksa ka yangi angur.

Kohima, Monupii/May 19 (TYO): Tenyimi Union Nagaland (TUN) executive council aser frontal organizations lungjemer May 15, 2026 nü Meluri district kübok Shilloi Lake nung Naga Plebiscite Day munga liasü.

Iba sentong nung Rengma Hoho tir Gwasinlo Thong, Chakhesang Public Organization tir Vezühü Keyho, Angami Public Organization tir Thejao Vihienuo aser Nagaland Zeliang People Organisation tongti zülur Enchang Hiaka nungeri o tatsütsü jembia liasü.

Iba sentong nung TUN tir Kekhwengulo Lea menden liasü aser Atathu Thurr-i Tsüngrem

temoatsü jazüka sarasadem.

Pochury Hoho tir Chonpa Jurry-i pela agizükba o jembi aser Chakhesang Mothers' Association ajanga sobaliba ken ka aten aser TUN kimen Mishento Apon-i treasurer report agüja liasü.

Sentong tembanga Tenyimi Women Union Nagaland tir Zhonelü Tunyi-i sarasadema liasü.

Iba sülen TUN ajanga Shilloi Lake temeket Avocado süngdong tema liasü aser International Trade Centre, Avangkhu semdang.

Ajisür parnoki Shilloi Lake nung Naga Plebiscite Day bilemteta sentong ka agiba nung

Dr. Tumda Newme menden liasü aser CPO tatong tir Vecüto Dozo-i saradadema liasü.

Razouvotuo Chatsu, Convenor, Advisory Board, TUN ajanga iba sentong nung jembidang, "Naga Voluntary Plebiscite ya khenyongi aibelena inyakba masü aser ibai asen linük nüchiso jenjang amenokba nung yariba takum kuli ka lir. Anungji asenoki tesüba lenir temi yutsüba tsüngsü nung jajatsüla," ta shia liasü.

Linük ka ama asen maitsü wazüka ayutsü mechi asebenoki asen national movement tenzüker temi long azünga yutsüba nung nokdaka parnok tsüngsü nung jajatsüla, ta pai ashi.

Wokha nung floriculture production technology training tenzükogo

Dimapur, Monupii/May 19 (TYO): Technology amshia naro tsünüba ajungba kumdaktsütsü asoshi anogo pongu training ka KVK Office Conference Hall, Wokha nung May 18, 2026 nü tenzükogo.

Iba sentong ya Tribal Sub-Plan (TSP) project "Strengthening Tribal Farming Systems Through a Critical Input Support System and Technology Backstopping under the KVK Instructional Farm" kübok senotsü teyari agüja ayongzüker alitsü.

Training tenzükba sentong akhumdong ka ama District Public Relations Officer (DPRO) Wokha, Lolano Patton-i jembidang, pei sasa pei

peria aser poksünga alitsü atema floriculture nung maongka aika lir aser lanurtem entrepreneurship adokdaktsür, ta ashi.

Iba training yagi shisatsü aser tasa tasen angutsü, shilem agirtem pei tashi ulushitsü atema skills agütsütsü, ta ashi.

Lai training agirtem dang temulung agüja aser yimya tajung amshia shilem agitsü aser takum alitsü asoshi naro metsüba yimya kuma amshitsü ajungmesoa liasü.

Laisa mozü nungi tenzüka terunem menemba industries aser shishilempaba tsütsü anogoshi naro yimya balala nung amshiba indang rateta shia liasü.

Fluriculture markets ulushiba nung digital marketing teimla lira ser Wokha district nung Flower Growers Associaton ka dentetnung ajungtsü, ta Lolano Patton-isa ashi.

Dr. Mhalo Tungoe-i iba training ayongzüka nükjidong aser training nung inyaksü sentongtem lemsatapa liasü.

Senior Scientist and Head, ICAR-KVK Wokha, Dr. Sandeep Deshmukh-i technology amshia floriculture tashi itshitsü nungdakba aser tajangzüker indang lemsatapa.

Anogo pongu sentong nung practical sessions, exposure visits aser sensaksemba mapangtem lemsar agitsü.

DDMA Wokha meyiwa asoshi renemshia senden amen



DDMA Wokha meyiwa asoshi renemshia senden amenba noksa nung angur.

Dimapur, Monupii/May 19 (TYO): District Disaster Management Authority (DDMA), Wokha meyiwa asoshi terenemshiba senden ka Deputy Commissioner, Wokha indang Conference Hall nung May 19, 2026 nü mena liasü.

Deputy Commissioner Wokha, K. Mhathung Tsanglao, NCS ajanga iba senden nung jembidang jelia renema alitsü

nungdakba indang ashi.

Pai jang o tzü, LPF, totzü aser mozü ama tongtipang nungdakbatem aliba aser lenmang aser ki o jen jenjang asadangtsü nungdakba ta ashi.

Iba senden nung jang o tzü, totzü, LPG aser mozü den National Highways, State aser District lenmangtem anepalutsü indang kanga jangja jembi.

NH-2 Doyang land sinking

areas, Wokha aser Bhandari jila tem nung kilentzü aoba lenmang müreksüba aser culverts aser retaining walls ama kisü-jensüba mapa indang osang agia liasü.

Doyang River Dam dak sendakba onüka jembia liasü.

Iba inyakyim nung shilem ka ama May 23, 2026 nü Wokha district tesem ajunga nung mürekmeja amungtsü iba senden nung lemteta liasü.

MELONGNEN O



Aso-23-05-1965 ~ Asü-12-05-2026

Onoki tetidang meima aliba tsürabur Asür **MRS SHIPUNUNGLA** Akhoya mapang tatsüka shiranga alidang aser iba lima toktsür aodang ana aser talang nungi medemmer, yimer-yimsanger, kiyonger, bendanger aser lokti balalatemü nübu, rongsen aser sarasadem agi nungita onok yariba atema kanga pelar. Tsüngremi nenok ajak maneni mojangma.

~ Temeim, Jala, anükapang aser kinungertem

Auyaba motorcycle ana Kohima Police-i ngutet



Dimapur, Monupii/May 19 (TYO): Kohima Police-i takok ngua auyar aliba motorcycle ana ngutet aser iba mapa tamajung inyaker tanur ana apu. Iba ken o ya Midland Colony, Kohima nung motorbike ka auyaba indang osang aruba nung ajemdaker May 8, 2026 nü benoka liasü.

Technical aser nisung itdangiterba nung kanga jeretpereta bushisüngdangba mapang parnoki temulung melemi alirtem jangjateta apu, shirnok juveniles lir.

Bushisüngdangba mapang Kohima Police-i Midland Colony nungi auyar aliba motorbike ngutetba kisüng masü saka ano North Police Station kübok auyago ta osang agütsür aliba motorbike tanabuba nguteta liasü.

Police temi kanga saksalema inyaksangshiba ajanga gari auyaba ken o ana ken nung benteta liasü.

Nisung ana apuba ya Juvenile Justice Act kübok shia aliba ama nungdakba mera agitsü atema Observation Home dangi yokogo.

Ozüng agi melaba maparen ajak tembangba sülen motorbike ana ya kibur nem amoktsü.

Kohima Police-i iba ama osettsüset dak sendakba mapa tamajung inyakba aziüoktsü aser nüburtem kumzüka ayutsü asoshi bendanga agütsür inyaker aser kasa mapang nüburtem dang kanga kumdanga alitsü aser temulung melemtepba mapa inyaksangshiba lira, anasatiba police station nung osang agüjang, ta Kohima Police sangdong ajangasa ashi.

Kohima nung Awareness-cum-Screening Camp ayongzüker

Dimapur, Monupii/May 19 (TYO): Public health services tashi itshitsü aser keraa tashidak putettsü aser menatempa tashidak nungi jenbua alitsü nükjidong nung Awareness-cum-Screening Camp ka DC Conference Hall, Kohima nung May 19, 2026 nü ayongzüka liasü.

Iba sentong ya District Integrated Strategy for HIV/AIDS (DISHA) ajanga District Administration Kohima aser Chief Medical Officer's Office, Kohima kübok sentong balala den lungjemer ayongzüka liasü.

Iba camp mapang HIV, Syphilis, Hepatitis B, Hepatitis C, Tuberculosis through Chest

X-ray, Blood Sugar aser Blood Pressure atema angati screening services agüja liasü.

Ibai HIV/AIDS ya public health tebilemtsü ka ama aliba samadaktsütsü aser menatempa aoba tashidak keraa puteta mapang shidak nung anepaluba ajanga iba tebilemtsü ajemdaktsütsü asoshi linük nükjidong aliba den lirumedema ayongzüka liasü.

Iba sentong yagi Mission AIDS Suraksha 95-95-99 targets nung yariser.

Iba camp nung staff züngsem 102 tashi arua teyari agia liasü, koba Deputy Commissioner Kohima, B Henok Buchem, NCS-i anir agia liasü.

Petrol, diesel jenjang ajungketba atema Congress-i Centre aitsü



Congress President Mallikarjun Kharge

New Delhi, Monupii/MAY 19 (Agencies): Petrol aser diesel jenjang liter nung paise 90 shi ajungketba sülen Congress-i manenei Ato Kilonser Narendra Modi-i aniba Centre sorkar aitsüogo. Hopta ka majung tsüingda tang agi tanabenbuba totzü nung jenjang ajungketogo.

Party indang official X account ajanga Congress-i, "Inflation Man' Modi indang süngzü agi nüburttem dak reploktsüogo. Petrol aser diesel jenjang paise 90 agi timba kümogo," ta ashi.

"Iba ya tetenzüker dang. Inflation Man yagi ano timba kaktetsü, kechiyong election temogo," ta party-isa shisem.

"Modi-i taoba anogo 4 tsüingda sen 4 ajungketogo. Tang linük nung petrol jenjang sen 109 aser deisel jenjang

sen 96 jungogo," ta kasa sangdong ajanga metetdaksü. Tang totzü nung jenjang ajungketba sülen New Delhi nung petrol jenjang 97.77 aliba 98.64 kümogo aser diesel jenjang 91.58 aliba 90.67 jungogo.

State meyong totzü shishilembaba company temi Hokolbarnü petrol aser diesel jenjang sen asem agi timba kümtsüba sülen anogo ishika lir totzü jenjang ago timba kümogo. Iran nung rara aser Strait of Hormuz nung tetsükdaksü adoker aliba ajanga alima ajunga nung crude oil jenjang timba akümba ajanga küm pezü tsüingda tang mezüingbuba India nunga totzü jenjang ajungketogo.


Ajisüaka yimti balala nung jenjang balala lir, kechiyong

value-added tax (VAT) balala lir. Mumbai nung petrol jenjang liter nung sen 107.59 aser diesel sen 94.08 lir. Kolkata nung petrol jenjang 109.70 aser diesel jenjang 96.07 aser Chennai nung petrol jenjang 104.49 aser diesel 96.11 lir.

Kasa mapang nung Compressed Natural Gas (CNG) jenjanga timba kümogo. May 15 nü Delhi aser Mumbai densema yimti balala nung CNG jenjang seret nung sen 2 agi timba kümtsü aser ano Deobarnüa sen 1 agi timba kümtsüogo.

US-Israeli nati February 28 nü nungi Iran amak tenzüka sülen Iran-ia meyiper Strait of Hormuz shimba ayuba ajanga alima ajunga nung crude oil jenjang taoba mapang dang nungi shilem 50 dak timba agi tasakba kümogo.

Atakzüka aliba anogo matong tsüingda India nungi Naxalism raktokogo: Amit Shah



Amit Shah

Jagdapur, Monupii/May 19 (Agencies): Union Home Minister Amit Shah-i Mongolbarnü ashiba agi, linük nungi Naxalism raktoktsü atema March 31 atakzüker aliba matong tsüingda takok ngua inyaktetogo, aser iba ya security force temi tasüita aser bendanga agüja inyakba ajanga lir.

Osangbenertem den sensaksemba mapang Shah-i, "Naxal-Free India Campaign" kübok anogo tongtibang kar lir, kong 2023 küm December 13 nü Chhattisgarh nung BJP

sorkar tenangzüktepba agia Naxalism raktoktsü atema sentong tenzüka densema lir ta pai ashi.

Ano 2024 küm August 24 nü state ajak nungi directors general of police (DG) tem adenshia 2026 küm March 31 nü tashi nungbo linük ya Naxal-free kümdaktsütsü asoshi bangjema liasü, ta Shah-i ashi.

"Tasembuba anogoji aseok ajaki meteta aliba ama 2026 küm March 31 nü asütsü (Naxalism raktoktsü atema centre-i atakzüka ayuba anogo).

Security force temi kanga tasü ita parnok taküm bendanga agüja inyakba ajanga atakzüka aliba anogo matong tsüingda linük nungi Naxalism meshi mshia raktokogo," ta Shah-i osangbenertem dang ashi.

Home minister-isa, ni kecha tatidakba makai Naxalism raktoktsü atema BJP-i yimsü masüba state balalai Union sorkar nem teyari agütsüogo, saka Chhattisgarh nung taoba Congress sorkari teyari magütsü ta shiteter, ta ashi.

Minister-isa, shisakartem kari küm aika iba tesem nung terenlok maliba ajanga Naxalism kanga mejungi prokshia ao, ta ashi.

"Ajisüaka ken o khenyongi balaka.. Naxalism aliba ajanga item tesemtem renloka motet," ta pai ashi.

Paisa, linük nung item tesemtem dang nungi jenjang tamajungba aliba tesemtema lir, saka item temsetem nung Naxalism maliasü, ta ashi.

Maneni Shah-i, May 19, 2026 tashi nung Naxalism agi mapang ka nung amokbanger aliba tesemtem nung terenlok balala adokba angutsü, ta ashi.

Bengal, Falta constituency nungi TMC candidate atsüing

New Delhi, Monupii/May 19 (Agencies): West Bengal kübok Falta assembly menden atema Mongolbarnü nüboyimba sentong tembangtsü lia Trinamool Congress (TMC) candidate Jahangir Khan-i ashiba agi, chief minister Suwendu Adhikari-i constituency atema special package ka sangdongtsü aliba dak ajemdaker pa election nungi atsüinginer.

Election Commission of India (ECI)-i, April 29 nü state assembly elections tanabuba shilem nung aibelen aika aliba ajanga Falta nung May 21 (Brehostoibar) nü election agishitsü sangdonga liasü.

"Chief minister-i Falta atema special package ka sangdongtsü ta shiogo. Ibayongji ni repoll nung shilem magitsü atema atsüinginer. Ni lisopur ka lir. Falta aser nüburttem yimjijimjung nung toktsütsü atema ni atsüinginer," ta Khan-i ashi.

Falta nung Bharatiya Janata Party (BJP) candidate Debangshu Panda atema nüboyimtsüba mapang

Adhikari-i iba osang ya sangdonga liasü. TMC spokesperson Jay Prakash Majumdar-i ken o dak sendakba nung telangzüba magütsü.

ECI ketdangsür kati, candidate kati tetoktepba nungi atsüingintsü asoshi telemtetba agiba ya pa jurila telemtetba ka lir ta shiogo.

Repoll indang result koba May 24 nü sangdongtsü ali, iba ya BJP-i assembly election nung menden 291 nungi 207 akokba sülen anogo shika lir agitsü lir. Iba election nung TMC-i menden 80 koka liasü.

Election tanabuba shilem agitsü lia Khan ya news nung kanga bulua adoka liasü. Police poll observer Ajay Pal Sharma-i TMC candidate ya amokmerenba video ka ayimsünga prokshiba sülen. pa ajaki jangja aküm. Iba mapang Khan-i, pai pa amokmerenba tsümbua mali ta ashi.

Hombarnü Calcutta high court-i, Khan anema ken o benoker aliba dak sendakba nung May 26 nü tashi kecha jenjang magitsü tetuyuba agütsüogo.

Taoba Uttarakhand chief minister Bhuwan Chandra Khanduri süogo



Bhuwan Chandra Khanduri

New Delhi, Monupii/May 19 (Agencies): Taoba Uttarakhand chief minister aser Union minister Bhuwan Chandra Khanduri, Mongolbarnü arishi küm 91buba nung süogo.

Khanduri ya military nung küm 40 shi (1954-1991) tenzüka Major General jenjang tashi atuba sülen yimden yimsütsüba nung dena liasü. Pa ya 1991 küm mezüingbuba Uttarakhand kübok Garhwal constituency nungi Lok Sabha atema shima liasü.

Khanduri ya pezüben tashi shim aser 2000 nungi 2004 küm tashi pai Union road transport & highways minister ama inyakogogo.

Chief minister ama Khanduri indang mezüingbuba term ya 2007 küm March nungi 2009 küm June ita tashi liasü. 2009 küm national election nung Uttarakhand nung Bharatiya Janata Party (BJP)-i junga shilem magitetba sülen pai mapa toktsü. Iba sülen pai maneni 2011 küm Septemeber

nungi 2012 küm March ita tashi chief minister mapa bena liasü.

Khanduri, shiba dang "General Sahib" ta ja-a liasü, pa 2014 küm Lok Sabha nung term pongububa atema shim aser parliamentary standing committee on defence (2014-2018) mendenbuba inyaka liasü. Paisa, transport, public accounts, aser home affairs dak sendakba nung tongtibang committee tem nung tenzükogogo.

1983 küm Khanduri nem Ati Vishisht Seva Medal agütsü.

Khanduri-i Corps of Engineers nung tongtibang mapa bena liasü. 1971 India-Pakistan rara nung pa lenisüba nung regiment ka inyaksangshia liasü. Khanduri, shiba 1934 küm October 1 nü Dehradun nung aso, pai army indang chief engineer amala tongtibang mapatem benogo.

Khanduri asüba osang prokshiba sülen Ato Kilonser Narendra Modi-i anir linük nung lenir balalai pa nem konang tetushi agütsüogo.



TIR YIMYIM

YIMOBILEM (EDITRIAL)

DIMAPUR WEDNESDAY, MAY (MONUPII) 20, 2026

Ya shir jajatsüba lenmang ?

Kecha lima nunga nübortem jajatsüba gari lenmang lapokjang ta nübortem longkak aita ola adokli, idangji government-i tatsüka yangluli aser anenli, anungji ano kasa nübortemisa longkak aita ola adokli ano idangjia tatsüka yanglutsüli aser anenli ta tanur ajep mesüzüka amtsük terara agütsü amai, lenmang meyanglunüseti tatsüka yanglur merenemtet anenadoktsübabo malitsü südi. Aji oda, alima nung nübortem longkak aitba lenmang ta ajatsüsa yanglutor akaba lenmangji Nagaland Foothill Road ya asütsü. Nagaland adena tanga state nung senzüdangbo fourlane lenmangbo yutsür 8 lane, 12 lane lenmang nung jajar. Item lenmangji nübortemi longkak aita yangludaktsüba lenmang masü saka government-i nübortem nüngdak reprangteta yanglutsüba gari lenmangtem lir. Asen o pi na tetsüngdaji aji lir. Aji oda, asenokbo pi masüji, Foothill Road inyaktur aliba ya renema inyaksü asoshi ano nübortemi timtem aser nüngsen agia aiben longkak aittsüsa akümtsü. Ano, asen o pi na tetsüngda kaji, pibo mapang shitak nung mapa shitak inyaker renemtsü meranger saka asenbo mapa mashimashi inyaka merenemtsü meranger. Aji oda, Nagaland nung alir, talisa Mon, Longleng, Wokha aser Mokokchung district nung alirtembo Assam majangibo pei district nungi Dimapur aser Kohima atongtsübaji tasak, anungji kodangsa Assam mokdangdir mesüra Assam ajanga senzü majungtsüsa tensa mapang mejungi kümdir, idangji kanga timatemer aser takoksa tulu ajurur. Ajisüaka, tanga district talisa Dimapur aser Kohima nung alirtemibo Mon, Longleng, Wokha aser Mokokchung nung alirtemi ajuruba timtemji majurur, anungji Assam majangi mejajatetsüsa akümba timtem takoksa indangji shishia mebilemer. Ashiko, ibayongji Foothill Road renemer, iba lenmangji bus aser khu abenba gari jajatsübaji Dimapur aser Kohima nung alir tangar kintemibo kecha balaka yongyaa malitsüa akok. Ibayongji, akok tashi Foothill Road ya tekaratiba nung renemtsü atema merangtsü melen, kin karbo lenmang yanglutsü lungjemba telungjem nungi atsüngzüka aoba angashir. Ibaji angashidang, Nagaland nung alir Naga nungertem ya pei jajatsüba gari lenmang yanglutsüba mapa nunga melungjemtetra, kechi nungang lungjemtettsü ta shisabolua bilemer. Ashiko, Nagaland nung aliba Naga kintemi tashi aser teyari agütsür inyakdaksüba Foothill Road Coordination Committee-i tsüngdong-tsüngdong oagi repranga inyakdaksüba agi government nung alirtem mesademi alitsüa akok. Ajisüaka, Nagaland nungbo nübortemi pei meyong lenmang aser pei meyong kiojen yanglutsür ta angateta, tsüngdong oagi nüka meinyakdaksüra mapa ajakji kecha nunga asütsü. Atangji, Nagaland government-i Foothill Road ya tuluba küma yanglutsü asoshi center nungi senotsü meshitsü tebilemba nung tang teyangludak mapa dena anena lir ta angazüker. Aji kanga junger, saka tuluba ka imlaa tang lenmang tilaka tupoka yangluyonga aoba mapa anena ayubaji, tsürabur shin o nung, "yar-a majishi aser sotsüa meyongshi," ta asüba ama ataloktsü ana nung lir. Nagaland nung ochiobendang angutsüba ki High court merenemteter, alima ajungi meteta asayar tajung adokdaksütsüba tesem State Stadium merenemtet tangar nem renemdaksütsü jembir aser tang Foothill Road merenemtet toktsür, ano lenmang tuluba ka yanglutsü asoshi jembir. Ashiko, asenok asoshiibo lenmang tuluba tetezüji lenmang tuluba nung jajatsüba masü saka sen teimba agizüka agitsüba tebilemba asütsüa akok. Ajisüaka, nübortembo Assam majangi foothill nung jajatsüla. Iba atemaji Ao Baptist Arogotem nungbo tenla sen dena sarua agütsüogo. Joko, lenmang meyangluli süra aser lenmang yanglutsü asoshi külemi telemtetba agirtem rongnunga karbo atsüngzüki süra, tanüngba purtem kükümshir, tang tashi nung foothill lenmang inyaka aruba nung endokba senotsütem bushisüngdanga oagi Delhi nung Union government den jembitsüla. Aji oda, Foothill Road inyaker contractor-tem rongnunga kar danga ozüng agi aitsütsüsa lira, itemjia bushisüngdangtsüla, idangji dang, ashiko, government nung alirtemi nübortem bushia alii alutsü. Akhi ama, timtema longkak aitba dang nungibo, nüngsenang agia, inyakyim nung shitak meshitak bushibajiang tajungba asütsüa akok .

OLEMSABANG

AJEMALUBA ASER OCHISHIBANUNG TEMOATSÜ

~ IMTIKUMLA IMCHEN

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

(Yashi adok nungi...)

Tebui oagi nungi pa aruba ngua lenji oa menürema ata. Tanubusang tepela jakten tener aruba agi tebu ang tepelaba liasü. Tebui pelaseta salemer kidangi ai aser tatalokbatem jembitepa tanuri ajakji ashinung tebui menüremloktsü. Kodang result adok tatidang agütsür ajak to notice board reprangi ao. Result adoknü ji yimer aika tejashi agi temulung asüng kechiyong parnoki makamaiter kibong sensatsüba to parnok kibongtem nung kar tasüba agi adong aser kar shiranga tatidang magütsüteti pei-i mapa tamajung inyakba agi parnok dak ala.

Tanubusangbo pa takok ngua zünyonga ao. Tanur ajak tain akümer asünung karbo kibong akümtsü mapang agi adong. Tsürabur aser adianu den mepilaner saka taküm piyong külemi dang alitsü meimchirji Tsüngremi yanglu masüji oda kibong akumtsü ta tebu o tetsü nati ashi. Kibong nung pelatepa lia aruba agi tsürabur ana ta tashi ita ang temang kümyang kümyanga liasü. Tsüngremi tepela mulungjangji taneptsü mozü tajung ta ashiba ji par kibong nung ataloka liasü.

Tanem tanemi tanutemji nisungji ka ka küma pei pei kibong mesütsüsa sorkar mapa karbo ngua tepela kibong ka ka kuma ali. Joko tanubusang shiba küm pongo(5) asüdang shirang aser anep, pa dang anüng aser kakat rijo tazüngtsü tashi züngteta dang ao. Paji kanga dang teyakyak mapa ajak nung tetangshi par metemer rongnunga balaka mecheta dang ajaki akumtsübua dang liasü. Kenü pa sarasademdak lokti kati ao, medemer a jenti arua liasü. Parnok ajak tanishibai anir pei menen nangzüka sarasadem. Idakji tsüngrem pa den jembir, ola kati pa dang ashi "na iba wadang abentsü shimogo" ta ashi, pai mangatet kidangi arur tebu asur tetsu dang tatalokbaji ashi nung

tena kang aoksa kechiyong taoba mapang a tena den kasa ola agi jembia liasü. Tebui ashi na iba atema kecha shisa tebulu mapang ka arutsü tsüngrem tenüng sanga dang atang ta shir doktsü. Mapang tatsüka lir tatidang ka agütsütsü form fill up asütsü pa dang ashi. Idangji tangarbo ajak süogo saka na maruba agi tanishiba dang ghondaka meshizüker na aru atadar tang yakta süng ta osang aru. Iba sülen aritepa oar pai fill up asu. Kodang tatitang agütsü mapang atong pa dang jelia metetdaksu kechiyong tanishirtemi pa aginüa liasu.

Ajemalurtem temoatsüba kechiyong parnoki alima senmang amangtsu ta Tsüngrem o-i ashi ama tanubusangji talitang agütsür rongnung tajungtiba adoka ano sorkari yaria temaba kakat riju nung azüngtsü pa sa adok. Yimdaki yimsüsürtemia temulung lema dang tanubusang dak aketba sempet tajungji ngua züngdaksübaji ajungai tesenlen ajak nung jembitepasa liasü. Pa azüngba rijuji yimdak nung lenmang tatsüka dang or alinung tsürabur adianu ajaki semdangteta külemi alir ama dang ajurutepa liasü. Iba denji school uniform aser süoshi ajak tanishirtemi dang agüja züngdaksu. Küm ishika zünger renem, ano temaba nung azüngtsü tanishiri asüngdang. Saka tanur asüdang sarasadem nung ola kati na shimtetogo ta ashiba bilemtet. Anungji pa Tsüngrem tenezuktsuang züngnür ta langzü. Ni aginüba aser züngnür ka lir ibajiang züngnür ta ajemalua tanubusangi theology azüngtsübaji kanga jangra nung talangka jembiteper joko koda masüji tanishirtemi odang doktsü, yimsüsürtemi pa tejangraba ngua odang yokdi mejungra joko na takoksa ta ashi.

Tanubusangi pelaseta dang langzü ni tebilemba tongtettsu sarasademjang ta ashi, teloki sarasademdaksü. Idangji pabo temokok agi ali nung tsüketer sarasadem baji manentet ghonda ka dak tali sarasadem asü. Nisung ajak kanga süngmang kechiyong yamala tanur kati iba tashi inyaktetba yabo odangbo masü pai bilemba wadangji Tsüngremi pa dang jilia ashibasa ta parnok jembitep takok ngudakjang ta shir doktsü. Joko sorkar nungi teyari kecha magütsütsü ta ashinung moatsütsü aser lenmang sayutsü ta pai angateta liasü. Kechiyong sorkari agütsüba teyari agi dangbo pa taküm tanüla jenjang metongtettsü ta bilema pelaseta dang nenoki melaba atema kanga pelar ta shir senshi.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yipru nung timtem ajuru alir nem arogo temi teyari agütsütsü renemer



Prayagraj nung May 13 nü yipru tesashi süyiba sülen süngdong tera makepa laor aliba ketdangsür temi mürekba ajanga nisung senzüba noksa nung angur. Iba yipru tesashi yagi Uttar Pradesh nung kanga mejungi kongshia nisung 111 asü ta sorkar ketdangsür temi ashir.

Lucknow, Monupii/May 19 (Agencies): Tawa Uttar Pradesh nung yimpru mopung tesashi den rer tsüka tsüngi aiba ajanga nisung 111 dak tema takum samatsür ano nisung 200 dak tema yirutsüba sülen Catholic arogo ka aser India nung Catholic bishops tem indang social service arm, Caritas India ajanga teyari agütsütsü renemba mapang lir.

Mapang masüdüng iba yipru yagi May 13 nü districts aika nung kongshi, kong mopung tesashi aon, tzunglu sashia arua tsüngi aia liasü.

Iba yipru dang yangji alirtemi "Andhi" ta ajar, koba nung mopung ya cyclone ama tesem kar nungbo ghonda ka nung kilometers 130 tashi kera aonba ajanga tesem aika nung teraksa bener arutsü.

Jila aser yimtsüngtem nung jara laoba, süngdong tera makepba, tsüngi aiba aser jana oshishiba ajanga nisung 111 aser 117 tsüngta asü aser aika yiru, ta ketdangsür temi ashir. Iba yipru agi kongshia aliba districts tem nung mozüki sünga asürtem aser yirurtem liasü.

Taoba mapang Allahabad ta ajaba Prayagraj district nung tesashitiba kongshia yangji nisung 21 asüba osang lir. Mirzapur nung nisung 19 asü, Bhadohi district - koba dang Sant Ravidas Nagar ta ajar - yangji nisung 14 nungi 16 tsüngta asü. Fatehpur, Unnao, Badaun, Bareilly aser Varanasi nunga ki o jen aika raksaba osang lir.

Bareilly district nung arishi küm 50 tain tebur ka yinjung ka amer mopung agi meters 15 shi ajungketba indang video linük sünga prokshia liasü. Pa takum kumzük saka temang kanga mejungi lir.

Iba yipru yagi ki, alu, senzüsempingba aser communication infrastructure tem kanga sashia raksatsü. UP indang Relief Commissioner's Office ajanga ashiba agi, ki 227 shi raksatsü aser kiset shiruru 170 nungi 179 tsüngta asü.

Yimtsüng meyirijang aika

nung mopung ghonda ka nung kilometers 100 dak tema sashia aonba ajanga kilem shisatsü, süngdong tera makepa lao, electricity poles sükdang aser power line raksaba liasü.

Railway lenmang nung süng laoba aser overhead power lines raksaba ajanga train services nunga kongshia liasü.

Iba den rer aser tzunglu kanga sashia aruba ajanga alu nung takoksa jenti bena arutsü. Nisung aika süngdong kübok jenoktsü merangba mapang asü ta ashir.

Iba lendong atalokba sülen UP Chief Minister Yogi Adityanath-i ketdangsürtem dang teyari mapa tekeraba nung inyaksü totuyuba agütsü.

State sorkarisa asür kibong shia compensation sen 4 lakh agütsütsü metetdaksüogo.

Iba yipru agi kongshia alirtem asoshi arogo balala aser humanitarian groups temi teka amteper yariteper.

"Rescue team temi meta talang nung aliba yimtsüngtem atongba sülen asü-amar tali akumtsü akok. Tanen makai tzunglu arubva ajanga administration tetsükdaksü tulu ajurur. Ajsüüka rescue team temi nisung takum kumzüksü asoshi akok tashi inyaker," ta Allahabad Diocese nung public relations officer Father Reginald D'Souza-i May 18, 2026 nü UCA News dang ashir.

Rescue operations tulu nung arogotem ano indang-indanga teka amuoka yaritepba mali saka arogo indang social service wing ajanga sorkar ketdangsür den osangtsüsang agiteper aser teyari mapa inyaksü renemer," ta ashir.

"Tang onoki local administration den osang agitepa teyari mapa inyaksü renemer," ta pai ashir.

Ozü arogo ya Caritas India, Catholic Relief Services aser emergency response efforts nung dena aliba n o n g o v e r n m e n t a l organizations balala den

inyaker ta ashir.

"Taoba Deobarnü (May 16) onoki local administration den senden ka menogo aser parnok nungi inyaksü sentong yangluba ataa lir. Aji renemba sülen onoki mapa inyaker tenzüksü," ta D'Souza-i ashir.

Kasa mapang Caritas India nung disaster management department nung ketdangsür Monisa Majumdar-i ashiba agi, arogo balala aser relief agencies temi timtem nung alirtem den yariteper.

Caritas India ya temelaba ataa liasü aser inyakyim ulushia maodang sorkar ketdangsür aser arogo balala den osang agiteper, ta lai ashir.

"Onoki nüngdakba temelabatem anguba sülen onoki inyaksü asoshi sentong yanglutsü. Onoki parnok den logistics agi yariteper aser Caritas India-i local authorities den akokba lenmang nung yaritepa arur," ta laisa ashir.

San Diego mosque nung nisung khasetba US bishop-i aitsür

San Diego, Monupii/May 19 (Agencies): San Diego nung aiba mosque complex ka nung May 18 nü security guard ka densema nisung asem khasetba asoshi Muslim nunger den külemi lungjemer nokdaka lir aser sarasademtsür, ta San Diego indang Bishop Michael M. Pham-i ashir.

Mapang tatsüka lir iba azüdokshi lendong agütsür ta temulung melemi aliba lanur ana pei sasa injang agi yiruba zübu mesük agi sür aliba ngutet.

Iba mapang anasa landscaper ka dak akha saka ajungtsü imlar, ta police-i ashir.

Iba mosque indang school nungi tanur shinga aser police kata meyiru, ta San Diego police-i ashir.

Ozüng amshirtemi iba lendong ya 'hate crime' ama bushisüngdang.

San Diego yimti kübok Clairemont kiyong nung aliba

ANOGO ABEN TSÜNGREM DEN

Timtem tashi

T. Ken 129:1-8.

Tekong 3 nung kija timatempa indang ashiba angur. "Alu alirtemi kü rungdong manung alu ala; parnoki meritsüng talang yanglu". Kija taküm kangshiba noksa aika Laishiba nung angur: Tzüyim yipru ajangba mi tesashi ajangba, tongpang rara ajangba aser khuret abenba. Kechiba ken züluri alu alabaji kija timatempa noksa ama amshi?

Mapa kaji, nüburtemi paji jana amshir ta ken züluri bilem. Parnoki ashir, "Na alu nung jana ama lir, aser onoki iba alu onsatsü, aser nai kechi bilemer onoki au ta mali". Asenoki Yisu asoshi lira, nüburi Pa amshiba ama asenoka amshitsü ta bilemang. Parnoki Pa jana-rüja ama amshi.

Iba noksa ochiba teyongtsüji alu alibaji alu rutsü asoshi lir. Kodang nüburi na jana ama amshidir, tai bushiba ne rungdong nung alenlokdir aser taittsüba agi ne rungdong tusadir, ya bilemtetang; alu rutsü asoshi Tsüngremi na renemtsüdagi. Kechi koma aluruba? Ibaji nai aremba metsü dak aket. Nai mang ayangba, tesempatep, tenük merem, mokok aji metsü remra alu rubaji taku asütsü. Saka nai Tsüngrem o metsü remra, temeim aser yimjung aser taremsük agi ne mulungjang nung yimsü südaktsüra, na ken zülur den Kibubaji Temeshi lir ta shitettsü- Pai iba tebilemtsü bentettsü. Idangji tekong 8 nung ashiba ama, alurubaji temoatsü ka alitsü: "Kibuba temoatsü nenok madak liang; Kibuba tenüng nung onoki nenok moatsür".

Ne taküm nung nai alu ruba ka kanera nai ali tusatsüla, atemtsüla aser tzü aintsüla. Koang nüburi na jana ama amshidir, kodang alu alaba ama ne taküm tetendangbaji alu alaba ama ne taküm ajanga odir, alu rutsü asoshi renemang. Tanü Tsüngremi na asoshi temoatsü alu ruba ka yutsür, anungji metsü shidak yoktsü bilemtetang.

Islamic Center of San Diego

nung iba lendong ya nikongdang 12:00 ako (par mapang) atongtsü lia atalok.

Ghonda ana shi tejakdang temulung melemi alir lanur ka tetsüi police dang lar jabaso ya pa sasa takum agitsü meranger aser la indang prangbong kar den la gari bener ayazükogo ta shia liasü, ta San Diego police tekolakbai ashir.

Lar jabaso ya medemer ka den camouflage süoshi agir kidang nungi ogo aser lai shiti ka nguteta lir ta lai police dang ashir, kong "general hate speech" zülua liasü, ta police-i ashir.

San Diego police-i temulung melemi alirtem ya arishi küm 17 aser 18 lir ta shia liasü.

Islamic Center indang director Imam Taha Hassane-i osangbener den jembidang, iba center ama tekülem agiba tesem nung tenük yokba ya

kangasa majung lir, ta ashir.

"Asen tebour tajung yimti nung danga mosques aser tekülem agiba tesemtem ajunga teti kumzüka ayutsüla," ta Hassane-i ashir.

"Ochi temeden aser talisa immigrants den yaritepba nung mapang talangka nungi Islamic Center ya külemi inyaka aru," ta Bishop Pham-i sangdong ka nung ashir.

"Tekülem ki tem ya teti tesunep, tekumzük aser sarasadem atema temeshi tesem ka asütsüla. Tamangba yimsü ka indang nüburtem dak amakba ya nisung meimchir ajunga indang temeshi akhum amakba lir," ta bishop-i ashir.

San Diego nung aliba Roman Catholic nunger ajunga tenüng nung jembidang, Bishop Pham-i iba lendong ajurua aliba kinungertem aser Muslim nunger ajunga den asükhulemsatep aser sarasademtsür ta ashir.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Yaden

(v) prokshia aliba benden (collect together soil like materials)

* Naro atemtsü atema ali temo yadena ayu.

Yatinü

(n) benjongbentsü nung tongtibatiba anogo (most important day of a festival)

* Moatsü yatinü nashi ak tepseta kinunger aser medemertem den pelateper.

OLONG PAITEP # 7509

1		2		3		4	5		
				6					7
		8							
9				10		11			
			12					13	
						14			
16									
						17			

TIPLÉN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S___i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 7508 TELANGZÜBA

TIPLÉN :

- 1. Semtu, 3. Lepko, 5. Bilem,
- 8. Ulu, 10. Tsünpang,
- 11. Tesangwa, 13. Aoksa, 15. Putir,
- 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

NAI-A YA METETTER



Alima nung jenjang tasaktiba ice cream ji Japanese brand Cellato ajanga yangluba Byakuya ice cream lir. Iba ice cream indang scoop mesüra cup ka indang jenjangji \$6,696 lir. Ibaji 8 lakh 80 thousand Japanese yen aser India sen nung Rs. 5.28 lakh) shi lir. Iba ice cream nung Sakekasu ta ser cheese tapu balaka amshir. Iba cheese ya Japanese sake drink yangludang adoker aser küm ka ser tesadang ka shi agia iba substance yanglur.

Tata Semiconductor project anasa satellite township survey athir



Guwahati, May 19, 2026

(Agencies): Assam sorkari Tata semiconductor project anasa satellite township ka amenoktsü survey asüba maparen anenogo.

Morigaon district kübok Tata semiconductor project anasa iba satellite township ya amenoktsü sentong liasü saka Tiwa aser Bodo kintemi lungkak aitiba ajanga iba maparen anenogo.

"Telok balalai anema noktakba ajanga township dak sendakba survey maparen athir" ta Morigaon District Commissioner Anamika Tewari-i Hombarnü metetdaksü.

Sorkar ketdangsürtemi Jagiroad anasa Sindhisar, Naldhara aser Bihita yimtsüngtem nung survey agia aru. Ajisüaka, iba tesem nung aliba lisopurtemi magizüker aser parnoki Gobha tribal belt nungi yimtsüngtem agientsü tsübua bilemer.

All Tiwa Students' Union den tanga lisopur teloktemi tesüba anogo asemnü tashi survey work dang masü saka township project athitsü atema takhangba agüja

lungkak aita arur.

Iba satellite township ya Tata Electronics Outsourced Semiconductor Assembly and Test (OSAT) facility anasa yanglutsü sentong liasü ta ketdangsürtemi ashi.

Iba semiconductor unit ya Rs 27,000 crore endoka yanglur aser iba nung flip chip aser Integrated System in Package (ISIP) dena advanced packaging technologies ajanga anogoshia 48 million semiconductor chips yanglutsü imlar.

Sivasagar MLA aser Rajior Dal tanishir Akhil Gogoi-ia Deobarnü land survey aser yimdaklirtem anientsüba maparen atema Assam sorkar aitsüogo.

Jagiroad nung Tata township project dak sendakba nung Tiwa lisopurtem aser tangar talidak belenshitsu akok ta pai ashi.

"Assam Chief Minister Himanta Biswa Sarma-i township project atema Sindhisar aser temeket aliba tesemtem nungi lisopurtem aniena putiotsü nung aibelen tulu meinyaktsü mepishir"

ta Akhil Gogoi-i ashi.

Taoba mapang Nagaon Paper Mill atema amshiba ali ya lisopurtem meyong lir aser sorkari industrial development atema Tata Group nem agütsüba aitsür ta paisa ashi.

Jagiroad paper mill tesem nung ali tuluka mamshii dang yua lir saka Tiwa aser tanga lisopurtem aliba tesemtem nung fresh surveys agiba ajanga lisopurtem mepelar ta Akhil-isa ashi.

"Lisopurtem anientsüba sentong ya meimchir anema lir, ozüngi memelar aser lisopurtem mezüngmeshiba inyakyim ka lir. Tiwa nungeri iba tebilemstü ola adokba ya kanga tim" ta paisa metetdaksü.

"Assam sorkari Jagiroad nung nisung memeindoktsü aser tashiyim agi ali magitsü ta official statement ka agütsütsüla. Sorkar iba sentong ya manenra ozü teloki Jagiroad nung alirtem den adentsü aser democratic mass movement ka tenzüktsü" ta Akhil Gogoi-isa metetdaksüogo.

Rajen Gohain-i Asom Jatiya Parishad nungi anener

Guwahati, May 19, 2026

(Agencies): Assam nung yimtenren lennir tejen aser taoba Union Minister Rajen Gohain-i Asom Jatiya Parishad (AJP) nungi anenogo.

Gohain-i AJP president Lurinjyoti Gogoi dangi züluba shidi ka nung AJP primary membership aser mapa ajak nungi anener ta shia lir.

"Asom Jatiya Parishad

lenisüba, züngsemtem aser pusemertemi kü den amalitepa yaritepba atema pelar" ta Rajen Gohain-isa shidi nung shia lir.

Taküm Assam Assembly elections nung Gohain-i Barhampur constituency nungi toktep saka Bharatiya Janata Party (BJP) candidate Jitu Goswami tsüngdang tamakok angu.

Arishi küm 75 tain lennir Gohain-i pa nija taküm nung

temulung agütsütsü bilemer ta ashir saka pai AJP toktsüba ajanga nisungtemi pai tarutsü asoshi sentong kar aliba ama jembitsü tenzükogo.

Gohain ya Assam politics nung lennir tejen ka lir aser taoba nung BJP züngsem ka ama liasü aser Nagaon Lok Sabha constituency nungi MP inyak. Paisa Union Minister of State for Railways inyakogo.

Indian Army-i kaketshirtem asoshi self-defence training camp agi



Itanagar, May 19, 2026

(Agencies): Spear Corps kübok Indian Army-i Arunachal Pradesh kübok Menchuka nung self-defence training camp ka ayonga agiogo.

Iba sentong ya Menchuka Valley School nung Class VI aser temapur asoshi ayonga agiogo.

Spearhead Division ajanga ayongzükba sentong ya physical

fitness, discipline aser self-defence awareness ajungkettsü nükjidong nung liasü.

Iba mapang Army instructors-i kaketshirtem dang basic self-defence techniques sayu aser situational awareness o confidence-building activities agia liasü.

Practical training dak alia camp nungsa lanurtem dang

leadership qualities, responsibility aser nation-building indang tayongzükbatem agüja liasü.

Ibala outreach maparen ajanga Arunachal Pradesh nung lisopurtem den tesentaktep akangshir aser temulung lemtep, amalitep aser külemi tarutsü yangerba nung shilem agir ta Indian Army-i metetdaksüogo.

South Korea, Japan nati energy cooperation atema mulungtepogo

Andong, Monupii/May 19 (Agencies): South Korea aser Japan nati Mongolbarnü, stockpiling aser petroleum product melenteptsüba densema LNG aser crude oil supply dak sendakba nung tesendaktep atsülangshitsü mulungtepogo, ta linük ana lenirtemi ashi.

Tir Lee Jae Myung aser Ato Kilonser Sanae Takaichi na Andong nung senden ka amemba sülen, parnoki energy supply line manokshidaktsütsü atema tesendaktep akangshitsü aser Asia nung tanga partner tem dena tesendaktep atsülanga aotsü, ta ashi. Middle East nung rara adoker aliba ajanga import dak metaloker aliba economy tem tetsükdaktsü adokba mapang iba tenangzüktepba ya yangluogo.

"Tawa Middle East nung tensa mejungi aliba ajanga supply chain aser energy market anokshiba mapang linük ana tsünga tesendaktep tali akangshitsü nüngdaka kümdaktsüogo," ta Lee-i osangbenertem den sensaksema mapang ashi.

Lenir ana yagisa, security dak sendakba nung tesendaktep akangshitsü, kong United States den trilateral cooperation densema lir, kechiyong kidanger linük ana ya North Korea-i amokmerenba densema tanga tetsükdaktsütem agi timtema arudar.

Lee-i ashiba agi, linük ana tsünga tawa vice ministerial jenjang nung security dak sendakba nung sensaksem akaba ajanga defence dak sendakba nung sensak asemtsü

atema lenmang lapoktsüogo. Andong nung senden amenba ya Lee tir akümba sülen lenir ana tsünga trokbenbuba aser taküm tanabenbuba ajurutepba asütsü.

Lenir anaprongla yagi, senden aiben ayongzüka amenba ajanga linük ana tsünga temulung lemtepba sayur, ta ashi.

South Korea aser Japan na alemli nungi mangatettep adoka lir, saka tesendaktep akangshitsü meranga arudar, kechiyong sorkar anapronglai rongsenketzüng kümzüka ayutsü, artificial intelligence densema technology dak sendakba nung terenlok atema tesendaktep ayutsü aser parnok meketa aliba tesem manokshi toktsütsü atema meranga arudar.

Nigeria nung ano kaketshir 39 aser tesayur 7 puer ao

Abuja, Monupii/May 19 (Agencies): Nigeria kübok southwestern Oyo State nung taoba hopta ozüng alema inyaksangshirtemi school balala maka kaketshir 39 aser tesayur tenet puer ogo, ta ketdangsürtem aser Christian association kati metetdaktsü.

Item teloktem yagi Hokolbarnü Oriire district kübok Ahoro Esinele tesem nung secondary school ka aser primary school ana maka liasü, ta ketdangsürtemi Hombarnü metetdaktsü.

Oyo State nung Christian Association of Nigeria mendenbuba Elisha Olukayode Ogundiya-i ashiba agi, nisung 46 puogo aser parnok rongnung timba ka arishi küm ana nungi 16 tsünga aliba tanurtem liasü.

Police-i ashiba agi, item teloktem yagi kanga junga sentong yanglur mapang ka nung dang Yawota nung Baptist

Nursery aser Primary aser Esiele nung ano tanga school ana maka tanurtem aser tesayurtem pur ao.

Tir Bola Tinubu-i item school tem amakba ya aitsüogo, aser puer aoertem ajak kümzüka anir arutsü atema federal sorkari Oyo State den inyakdar, ta ashi.

Governor Oluseyi Abiodun Makinde-i ashiba agi, puer or aliba tesayurtem rongnung kabo Deobarnü tepsetogo. Ken o dak sendakba nung, osang agütsür aser nisung puer aoertem nem logistics supply agütsür densema temulung meleme bilemer trokbo puogo, ya paisa shisem.

Item school tem amakertemi improvised explosive device tem rema toktsüba sülen army, police aser iba tesem nung alirtemi item tanurtem kümzüksü merangba nung tetsükdaktsü adoka parnok

aika yiruogo, ta Makinde-i ashi. Yirur alirtem temang anepaludar, ta paisa shisem.

Ozüng alema inyaksanshiba teloktemi nisung puer aoba ya küm tem tsünga Nigeria atema security dak sendakba nung tetsükdaktsü ka kümogo. Item teloktem yagi sen atema sen z ü s e n p o n g e r t e m , kaketshirtem aser yimdak yimtsüng nung alirtem pua bener aoer. Parnoki school tem dak rangloker inyaker, saka linük southwest lenbo iba ya kanga buluabo mataloker.



Israel-i May 19, 2026 nü Lebanon south tsütsü Nabateih yimti nung tayimtsü amshia amakdang raksatsür aliba ki ka nung nisungtemi tanaben amshitetsüba osettem bushiba noksa nung angur. Israel aser Lebanon na ceasefire hopta asem atsülangtsü April 23 nü mulungtep aser ano Hokulbarnü anogo 45 atema ceasefire atsülangtsü mulungtepogo.

Office of the
MOLUNGYIMSEN SENSO MUNG DANG
P.O. Tuli, Mokokchung : Nagaland

Tenüngsang Agütsür

1. Wb. T. Chuba Jamir aser Wt. Aola na jabaso **Nungsangtemjen C Jamir**-i NSSB ajanga ketdangsüa agiba tatidang nung LDA cum Computer Assistant (District), Works and Housing (NPWD) mapa anguba,
2. Adv. Imtisungkum Jamir aser Wt. Asenla na jala **Meyirenla Jamir**-i Maple Tree School nungi CBSE tatidang nung Humanities (Arts Stream) nung 94.2% nguteta tematiba jenjang takok anguba,
3. Wb. Imjunglong aser Wt. Narola na jabaso **Wadangchet Nokdir**-i Maple Tree School nungi CBSE tatidang nung Commerce Stream nung 93.8% nguteta tematiba jenjang takok anguba.

MSM-i nür asemprong nem tenüngsang tulu agütsür aser yimertem asoshi konang bentsür aruba atema pelaba shisemer. Tsüngremi nenok wadang nung maneni azükaru lidakjangma.

Sd/-
N. Joseph Lemtur.
President

Sd/-
B. Imsuinba Jamir
Secretary

LONGJAKREP SEMCHIR LIPOK
BUSHIR LUDEN
ZÜNGSEM NUNGIANENER

"Longjakrep Semchir Lipok Bushir Luden" züngsem pungo (5) rongnung nia ka shim. Ajisüaka 'Longjakrep Semchir Tera' (Lirem Kaket) kaket zülua adokba maparen nung nibo aiben mejasemi inyak. Iba den ozü Salong Semchir otsü aser tarensen nung onoki zülua agütsüba ama masü aibelen aser tashishitsü adoka lir. Iba amala luden nungji ni adentsü menügdaker, anungji tanü 19 May, 2026 anogo nungi anener.


LONGKUMWATI SALONG (Ungma)
Mongsenbai Ward, Mokokchung

OFFICE OF THE
TULI LENDEN MULTIPURPOSE CO-OPERATIVE SOCIETY LTD
TULI, DIST. MOKOKCHUNG, NAGALAND
Regd. No. NL/0822 Dated : 18.8.89

MEETING ALITSÜ SANGDONGER

Tuli Lenden Multipurpose Co- Operative Society Ltd. 11th Buba küm tatem Inti Mungdang 29th May 2026 nung alitsü sangdonger. Tesentepdak : Senyur - M. Lanu Imsong
Mendenti Ward Tuli Town.

Sd/-
T. Manen Yaden
Joint Secretary

BRICS senden atema September ita Putin-i India semdangtsü

Moscow, Monupii/May 19 (Agencies): Russia Tir Vladimir Putin-i September 12-13 anogotem BRICS Summit 2026 nung adentsü atema New Delhi-i aotsü, ta Kremlin ketdangsür Yuri Ushakov-i Mongulbarnü ashi.

Iba ya Putin asoshi küm ka tsünga India-i tanaben arur asütsü. Russia tir ya taoba küm December ita 23rd India-Russia Annual Summit atema New Delhi-ia oa liasü, kong pai linük ana tsünga tesendaktep tashi itshitsü atema India Ato Kilonser Narendra Modi den jembishinüa liasü.

BRICS telok nungya 2026 küm asoshi India-i chairmanship bena lir. India indang BRICS presidency dak sendakba nung senden aser sentong aika taküm ayongzüka arur.

Taoba BRICS senden ya Rio de Janeiro, Brazil nung July ita "Strengthening Global South Cooperation for a More Inclusive and Sustainable Governance" omen kübok agia

liasü. Tan ita tetenzüklen Sergey Lavrov-i BRICS foreign minister tem senden nung adentsü India-i arua liasü. Iba mapang Lavrov-i Ato Kilonser Modi ajurua Ukraine aser West Asia nung tang rara aliba densema onük balala jembia liasü.

BRICS ya sorkar balalai tenzükba lokti ka lir, koba Brazil, Russia, China aser South Africa linüktemi rongsenketzüng, yimtenren aser libaliru tashi itshitsü atema tenzükba liasü.

Iba bloc nungya alima nung nütsüng yongsük aser global gross domestic product shilem tuluka lir, aser parnoki international financial systems melenshitsü aser 'emerging economies' rongnung rongsenketzüng tsütsü amalitep tajungba akumtsü rangloker.

Iba alliance nungya Egypt, Ethiopia, Iran, Saudi Arabia aser United Arab Emirates ama züngsem tasentem anioka lir. India ya mapang talangka

nungi Russia den tesendaktep tajung yua arur aser tang tashi Moscow ya tongtipang linük ka ama New Delhi-i repranger.

Talisa India indang defence tsütsü hadir aika Russia nungi arur aser yangji S-400 Triumph air defence system, Sukhoi fighter jets aser külemi yangluba BrahMos missile system dena lir.

Ano India indang energy security asoshia Russia ya tali tongtipangba akumer. Ukraine rara tenzükba ajanga anüolen linük temi Moscow nem tenokdangba agütsüba sülen India-i Russia nunger totzü tazü jenjang ajemer aliba tali kumogo. Iba mera yagi alima nung energy jenjang tali akumdang New Delhi kumzüka ayur.

Defence aser energy kisüng masü iba tesendaktep yagi China ya India tejangraba nung indang-indanga teka mamoshiteter. Ajidang masü United Nations Security Council nunga Russia-i ken o aika nung India bhukuma arur.

World Gymnastics-i tenokdangba agintsü

Monupii/May 19, 2026 (Agencies): International Gymnastics Federation-i Russia aser Belarus nunger asayartem nem lenmang lapoktsüogo.

Hombarnü sangdong ka ajanga World Gymnastics-i, Russia-i 2022 küm Ukraine amakba sülen linük ana nungi asayartem nem tenokdangba agütsür aliba agintsüogo.

Hopta tatem Sharm El-Sheikh nung federation indang sanen luden senden amenba mapang iba telemetba agia liasü.

Iba telemetba agiba tetezü Russia aser Belarus nunger gymnast tem neutral asayartem ama masü saka linük wako aser linük naklo ken tena asayamung balala nung shilem agitetsü.

Maneni linük anaprongla nungi asayartem ya kija asaya nung dang masü saka team

asayatem nunga shilem agitetsü. World Gymnastics-isa, Ukraine rara pusemertem mesüra military mesüra security service tem den sendaka alirtem nem tenokdangba agütsür aliba agintsüogo.

Ajisüaka federation-i iba telemetba agiba indang osang tejanga magütsü.

Iba telemetba agiba ya International Olympic Committee-i tawa tinyaktsü kar agütsüba anema lir.

Iba ita tetenzüklen IOC-i international federation tem dang Belarus nunger asayartem maneni asayadaksütsü saka Russia nunger asayartem nem maneni tenokdangba agütsütsü shia liasü.

World Gymnastics-i iba tetuyuba sülen manidaki linük anaprongla nungi asayartem nem linük tenüng nungi

asayatsü atema temelaba agütsüogo.

Iba telemetba agiba ajanga Russia aser Belarus nunger asayartem Los Angeles nung 2028 Summer Olympics atema qualification nung shilem agitsü atema lenmang lapoktsüogo.

Kasa mapang nung International Judo Federation aser swimming authority-ia, Russia aser Belarus nunger asayartem asayadaksütsü asoshi vote agütsüogo.

Maneni boxing Federation-ia, IOC-i tetuyuba agütsüba sülen Belarus nunger asayartem nem tenokdangba agütsür aliba agintsüogo, saka Russia nem maneni tenokdangba agütsür lir.

Ajisüaka tanga federation temi linük ana nungi asayartem asayadaksütsü maneni anemer, kong International Skating Union aser World Athletics nata densema lir.

Bumrah, Jadeja na AFG series atema anisüngzükdaksüogo

Monupii/May 19, 2026 (Agencies): Afghanistan den taruba asayamung atema Rohit Sharma aser Virat Kohli nata India squad nung züngoksemogo. BCCI-i Mongolbarnü June ita Test ka aser ODI asem atema asayartem sangdonga liasü.

Jaspri Bumrah aser Ravindra Jadeja na Test aser ODI naprongla atema anisüngzükdaksüogo, aser wicketkeeper-batter Rishabh Pant ODI squad nung mali.

Rohit aser Hardik Pandya na ODI squad nung züngoksema lir saka temang tajungba kümmer ali nung dang asayadaksütsü.

India ODI squad ya Shubman Gill lenisüba nung asayatsü, koba 2027 ICC Men's Cricket World Cup atema renemshiba asayamung ka ama züngshir.

Gill lenisüba nung formate anaprongla asayatsü aser Test atema KL Rahul vice-captain asütsü shimogo. Test squad nung Gurnoor Brar, Harsh

Dubey aser Manav Suthar nungera tang mezüngbuba züngoksema lir.

ODI squad nung Prince Yadav tang mezüngbuba India team nung züngoksemogo. ODI atema Shreyas Iyer vice-captain asütsü shimogo, kong asayar tejen Virat Kohli, KL Rahul nungera densema lir.

India aser Afghanistan na Test asaya New Chandigarh nung June 6 nungi tenzüka asayatsü aser ODI asayamung ya Dharamsala nung June 14 nü tenzüksü.

Test asaya atema India squad:

Shubman Gill (captain), Yashasvi Jaiswal, KL Rahul (vice-captain), Sai Sudharsan, Rishabh Pant, Devdutt Padikkal, Nitish Kumar Reddy, Washington Sundar, Kuldeep Yadav, Prasidh Krishna, Gurnoor Brar, Manav Suthar, Harsh Dubey, Dhruv Jurel.

ODI asayamung atema India squad:

Shubman Gill (captain), Rohit Sharma, Virat Kohli, Shreyas Iyer (vice-captain), KL Rahul, Ishan Kishan, Hardik Pandya, Nitish Kumar Reddy, Washington Sundar, Kuldeep Yadav, Arshdeep Singh, Prasidh Krishna, Prince Yadav, Gurnoor Brar, Harsh Dubey.

India aser Afghanistan na tang agi tanabenbuba Test asayatsü lir. Team ana ya 2018 küm Bengaluru nung Test ka asaya liasü.

Afghanistan aser India na asayamung mapanglem:

Test: June 6-10, New Chandigarh

1st ODI: June 14, Dharamsala

2nd ODI: June 17, Lucknow

3rd ODI: June 20, Chennai.

Naga teloktemi Thadou... (Tapak 1 nungi)

Külen, Thadou Inpi Manipur-i "Kuki" aser "Thadou" maitsütem tsüngda atsütepba indang teblemtsü lemsatopogo. Rev Vumthang Sitlhou-i May 9 nü "Kuki-Zo Flag" atsükettsü memulung aser pa ya Thadou nunger asoshi tongtipang lennir ka ama züngshi ta May 17 nü TIM-i sangdong ka nung ashi ta UNC-isa sangdong nung shia lir.

Iba lendong ya Kuki telungpurtem aliba tesem ka nung atalok aser iba tesemi non-Kuki armed groups aotsübaji tamakoktsü liasü ta UNC-isa shi.

KLA (L)-i Churachandpur nung Manipur Chief Minister den senden mamentsü tenokdangba agütsü aser iba jagi arogo lennirtemi semdangba ya parnoki tamajunglen bilem asütsü akok ta UNC-isa metetdaksü.

Thadou nunger arogo lennirtem tepsetba ya Kuki nunger teloktemi asütsü akok aser non-Kuki armed groups-ibo shilem kecha magi ta UNC-isa nenshiogo.

Parnokisa public dang kuli maliba tiyazü osangtem prokshiba anentsü mepishia metetdaksüogo.

Malaysia Masters: Hariharan aser Arjun nati Popov Brothers kokogo

Monupii/May 19, 2026 (Agencies): India tebur badminton tarep asayar Hariharan Amsakarunan aser MR Arjun nati Mongolbarnü Malaysia Masters mezüngbuba round nung Malaysia nunger seventh-seeded tarep Christo aser Toma Junior Popov na kokogo.

European Championships runners-up den mezüngbuba round asayatsü ataba sülen Hariharan aser Arjun nati asaya akoktsü kangabo mimlai liasü.

India nunger tarep yagi mezüngbuba game 21-19 agi akok aser tanabuba game nunga asaya ya 21-15 agi koka Popov brothers tsükdaksüogo.

Hariharan aser Arjun na taruba asaya Indonesia nunger tarep Leo Rolly Carnando aser Daniel Marthin mesüra China

Neymar Brazil World Cup squad nung züngokkogo



Monupii/May 19, 2026 (Agencies): Neymar, Brazil indang World Cup squad nung züngoksemogo, koba anogo ishika tejakdangang local analysts aser taoba mapang football asayartemi takoktsü masü ta bilema liasü.

Arisihküm 34 tain Brazil nunger rongnungi goal (79) timtiba idaktsür aliba asayar ya 2023 küm October ita tabelen ACL yiruba sülen junga masayateti arudar.

Coach Carlo Ancelotti-i sangdongba asayar 26 rongnungi imla aliba ama kümtem tsüngda Brazil nunger nungtugu asayar Vinicius Junior aser Raphinha nata densema lir.

Italy nunger coach, shiba iba mapa ya 2025 küm May ita agizüka liasü, pai Hombarnü asayartem mesangdong tsüngda Neymar khen danga jaoker maliasü.

Ancelotti-i taoba hopta Brazilian Football Confederation den tenangzüktepba yanglushiogo, aser pa 2030 World Cup tashi inyaktsü. Ajisüaka pa Brazil nung tang tashi nung tetsükdaksü aika ajangshidar, kechiyong asayartem aika yiruba ajanga

World Cup squad nung medentetsüsa kümogo. Strikers Rodrygo aser Estevao na yirur lir asünung taküm North America nung asayatsü aliba World Cup nung ya masayatetsü.

World Cup 2026 atema Brazil squad:

Goalkeepers: Alisson (Liverpool), Ederson (Fenerbahce), Weverton (Gremio)

Defenders: Alex Sandro, Danilo, Leo Pereira (Flamengo), Bremer (Juventus), Ibanez (Al-Ahli), Wesley (Roma), Marquinhos (Paris Saint-Germain), Gabriel Magalhaes (Arsenal), Douglas Santos (Zenit St Petersburg)

Midfielders: Bruno Guimaraes (Newcastle), Casemiro (Manchester United), Danilo Santos (Botafogo), Fabinho (Al-Ittihad), Lucas Paqueta (Flamengo)

Forwards: Endrick (Lyon), Gabriel Martinelli (Arsenal), Igor Thiago (Brentford), Matheus Cunha (Manchester United), Raphinha (Barcelona), Vinicius Junior (Real Madrid), Luiz Henrique (Zenit St Petersburg), Neymar (Santos), Rayan (Bournemouth).

nunger tarep Hu Ke Yuan aser Lin Xiang Yi na den asayatsü. India nunger tarep ya March ita Orleans Masters nung quarterfinals tonga asayaogo, saka tena Carnando aser Bagas Maulana nati tsükdakja liasü.

Taoba küm Hariharan aser Arjun nati November ita Telangana India International Challenge akok aser iba den Turkiye International Challenge aser Al Ain Masters dena kokogo. Tenatasa May ita St. Denis Reunion Open kokogo.

Hariharan aser Arjun na ya tang world rankings nung 31buba nung lir, aser Malaysia Open nung asayatem koka tura

tena top 30-i aitsü.

Kasa anogo tarep temeyoktep asayar Sathwik Kanapuram aser Radhika Sharma nati qualifier asaya nung Datu Asrah aser Clarissa San na koka liasü. Ajisüaka tetsür kija asaya nung Aakarshi Kashyap-i South Korea tsür Park Ga Eun makok.

Tetsür tarep asaya nung Ashwini Bhat aser Shikha Gautam nati mezüngbuba round nung Canada nunger tarep Jackie Dent aser Crystal Lai nati tsükdaksüogo. Ashmita Chaliha-i tetsür kija asaya qualifier nung Chinese Taipei tsür Pai Yu Po kokogo.

BILEMDANGANG

"Shibai tasü maiter, pai takum nung kecha majangzüktsü."